

林、孙琴西二公逸事，使人喟然。如琴西者，真古之人哉。

初七日。复曾摯民一信。沈管樵、王逸吾来谈。丁瑞亭放碣石镇，亦枉过一谈。管樵，幼丹尚书犹子也。

初八日。郁热。刘云生、魏赓臣、李果仙过谈，遂尽一日之力。长日如年，日以酬应了事，深以自惜。是日大有雨意，而大风忽起。

初九日。傅青馥、舒兰生过谈。接黄云生龙阳信，知已接其尊人黄仙峤观察就养署中。

初十日。魏赓臣来谈，知合肥所商，已自派许仲韬赴上海。盖总署要其一奏，强使任之，合肥又别出一意，不欲效鄙人之愚也。土尔其方与德、法二国构衅，英人方谋助之，兵力不能远及。威使亦亟欲得一转旋之法。仲韬此去，必有成议。鄙人或可接续乞假以行矣。

十一日。致合肥伯相书，兼致筱荃制府一书。又书寄蒋小吾，并为其尊人致挽幛挽联，托魏赓臣寄保定。本交子寿带往，子寿行甚急遽，未及交之。是日微雨。

十二日。魏赓臣来，托为李小峰致书唐景星，当以交之。是日日夕雨势甚重，大风凉甚，竟不成雨。

十三日。稍立课程看书：《朱子语类》十叶、子书四叶、黄山谷诗十叶，看毕始理酬应。假中数月，无一日不会宾客，大率人生精力，十九耗于酬应，殊无谓也。

十四日。周桂坞、裕时卿、魏赓臣次第过谈，遂尽一日之力。长日如年，以酬应闲谈了之，良为可惜。

十五日。潘伯寅过谈。接曾沅甫信，始知河南旱势更甚于直隶也。接曾沅甫信，并传见递折之王弁，详询一切。

十六日。李果臣、苏菊生、彭菊生、谢隐庄、夏宝生次第过